

# AKTUELNOSTI

## Dvije decenije Tužilaštva Brčko distrikta BiH

### Tužilaštvo obilježava punih dvadeset godina rada

Ovih dana Tužilaštvo Brčko distrikta BiH obilježava 21. godišnjicu od osnivanja i dvije decenije djelovanja na području distrikta Brčko kao jedinstvene lokalne samouprave pod suverenitetom Bosne i Hercegovine. Ovaj važan jubilej podsjetnik je na vrijeme integracije pravosuđa Distrikta, ali i na dvodecenijski razvoj ove pravosudne institucije. Kao odgovor na institucionalne izazove, cijeli ovaj period obilježen je stalnim jačanjem integriteta, efikasnosti i transparentnosti ovog tužilaštva s prioritetskom odgovornošću prema stanovništvu Distrikta i najširoj javnosti.

Kao samostalan i nezavisan organ koji preduzima propisane mjere i radnje u otkrivanju i gonjenju počinitelja krivičnih djela Tužilaštvo je svih proteklih godina nastojalo na najbolji način odgovoriti svojim zadacima. Čvrstom saradnjom s domaćim i međunarodnim institucijama i nevladinim organizacijama, medijima i građanima, uz puno uvažavanje i ostvarivanje ljudskih prava i građanskih sloboda, Tužilaštvo u kontinuitetu djeluje na učvršćivanju vladavine prava kao apsolutnog institucionalnog cilja. Kroz intenzivnu saradnju s lokalnim institucijama, u prvom redu sa sudovima i Policijom Brčko distrikta, Tužilaštvo teži pružati doprinos izgradnji sigurnog i pravednog okruženja za sve građanke i građane distrikta Brčko.

U ostvarivanju svoje misije i vizije, uvažavajući najviše standarde profesionalnog integriteta Tužilaštvo je uvijek nastojalo promovirati odgovornost, marljivost i profesionalizam, kao nužan standard ponašanja u javnoj službi i uslov potpunog povjerenja javnosti. U uvjerenju da se u protekle dvije decenije u tome značajno uspjelo, Tužilaštvo Distrikta će svakodobno i sve intenzivnije nastaviti raditi na daljnjem ostvarivanju ove vizije.

*Tužilaštvo Distrikta osnovano je Zakonom o Javnom tužilaštvu Brčko distrikta Bosne i Hercegovine iz 2000. godine, koji je s primjenom počeo godinu dana kasnije, tačnije 1.4.2001. godine. Tada su od ranijih tužilaštva koja su djelovala na području predratne opštine Brčko preuzete nadležnosti za krivična djela počinjena na ovoj teritoriji pod jurisdikcijom sudova Distrikta. Pod sadašnjim nazivom Tužilaštvo Brčko distrikta Bosne i Hercegovine djeluje od 2007. godine.*

**GLAVNI TUŽILAC**

**ZEKERIJA MUJKANOVIĆ**